

# A Scimia

L'anu chjosu ind'una gabbia  
Mi dumandu sempre perchè  
U dicenu periculosu,  
Purtatu nant'à u piacè  
Nantu a so porta hè scrittu SCIMIA  
Ma eiu guardendu lu bè  
Li trovu ancu una sumiglia  
Incù u ben'di Carlu Ghjisè  
Attenti à a scimia !

Davant'à a gabbia, imbadate  
Margherita, Santa è Ninnì  
Guardavanu maravigliate  
Una cosa ch'ùn possu dì  
Per ùn dispiace troppu à mamma  
Eiu parleraghju cusì  
Quell'essere avia una stanga  
Chì si ne vede poche quì  
Attenti à a scimia !

Ma a gabbia chjudia male  
È à l'ispensata s'apri  
È ne surtì quell'animale  
Dicendu : « Avà basta cusì !  
Di e seghe n'aghju una techja  
È di ghjucà mi cù issu ballò  
Appruntate e patanechje  
V'aghju da fà vede quale eo sò ! »  
Attenti à a scimia !

Amparendu ch'ellu era pussellu  
Margherita, Santa è Ninnì  
Attipponu per u chjusellu  
Dicendu : « ùn ci vole à stà quì ! »  
Santa dicia : «N'aghju vistu

Ma di ssu calibru custì,  
Mancu quellu parasciuttistu  
Ch'eu cunnobbi à Djibouti ! »  
Attenti à a scimia !

Tandu nacque a cunfusione  
È tutta la ghjente scappò  
Fora di un ghjudice di struzzione  
È d'una vechja in caraccò  
A vechja disse : « Anima santa,  
Dipoi ch'ellu hè mortu Antò  
Ùn n'aghju paspatu tantu,  
Ùn diceria minca di innò ! »  
Attenti à a scimia !

Quellu ghjudice spenseratu  
Pensava : « chì mi pò fà ? »  
Da una scimia à un magistratu  
Ci hè qualchì differenza ma  
L'animale pocu garbatu  
Di a vechja ùn si primurò  
Trascinò u disgraziatu  
Ind'è a chjostra di Petru Antò  
Attenti à a scimia !

Ciò chì si passò à lu bughju  
Ùn vi la possu mancu cuntà  
Di lu magistratu lu mughju  
Si sentia da fiume in dà  
Sgucciulava, stringhjia i denti  
Pienghjulava è chjamava : « O MÀ ! »  
Cum'è tanti è tanti nucenti  
Ch'ellu avia fattu scapà  
Attenti à a scimia !